

adr-

ALTERNATIV DEMOKRATESCH
REFORMPARTEI

de pefferkär

D'Alternativ fir Esch

Gemengewalen 2017

Lëscht 6

Firwat sollt Där e Sonndeg d'ADR wielen?

D'ADR ass eng sozial engagéiert Partei, déi d'Wäerter, d'Kultur an d'Sprooch vum Lëtzebuerger Land vertritt a verdeedegt. Mir maachen eis staark dofir, datt eis Lëtzebuerger Traditiounen an eis Manéier mateneen ze liewen dem Land a senge Bierger erhale bleiwen. Net nëmmen um nationalen Niveau, mee och um kommunalen, triede mir a fir d'Rechter vum Eenzele an de Respekt vun der Demokratie.

Eng gutt Gemeengeféierung këmmert sech ëm d'Sécherheet an d'Biergerbedeelegung. D'ADR setzt sech a fir passend Sécherheitsmoossnamen an all Gemeng. Mir ginn eis net zefriden, bis all Mënsch sech hei am Land nees sécher fillt a séch iwwerall ouni Angscht beweegen kann, an dëst och zu spéider Stonn. A punkto Biergerbedeelegung fanne mir et méi wéi traureg, datt bis elo Gemeengepolitik dacks iwwert d'Käpp vun de Leit ewech gemaach gouf.

D'ADR wëllt d'Gemengen zesumme mat hiren Awunner gestalten, an als hir Verrieder d'Gemeng geréieren, am-plaz ze dirigéieren. Aus dësem Grond fuerdert d'ADR kloer de Referendum op kommunalem Niveau a mécht sech staark géint Korruptioun a Vetternwirtschaft an der Politik. Zesumme mat den Awunner wëlle mir eng Gemeng schafen an erhalen, déi net just bewunnbar ass, mee och déi néideg Liewensqualitéit bitt. Dëst mat engem Wunnraum, deem d'Leit sech leeschte kënnen, ouni dofir mussen u Liewensqualitéit anzebéissen.

D'ADR mécht Politik, déi sech no de Bedierfnesser vun de Leit riicht an net ëmgedrënt. Mir sinn dofir fir eng realistesch an effizient Ëmweltpolitik, déi net duerch realitéitsfrem Normen a Virschrëften de Leit an der Gemeng d'Bezuele vu Wunnraum onméiglech mécht. D'ADR wäert beim Erhale vu wäertvoller Bausubstanz hëllef, an net d'Renovéieren an d'Baue mat iwwerspëtzte Reglementer onméiglech maachen. D'ADR mécht Politik fir d'Leit a mat de Leit.

Weider nach wëlle mir verhënneren, datt de Staat iwwert de Käpp vun de Gemengen ewech Entscheedungen trëfft, mat deenen d'Gemengen an hir

Awunner direkt konfrontéiert sinn. Sou wäerte mir et net hinhuelen, datt de Stat, ouni der Gemeng an hiren Awunner hiert Zoustëmmen, e Flüchtlingsfoyer an enger Gemeng ariicht.

Mir als ADR maachen eng kanner- a familjefrëndlech Gemeengepolitik. Mir fërderen héichwäerteg Crëchen, fuerderen awer, datt d'Elteren och ëmmer d'Méiglechkeet hunn, hir Kanner mat der néideger Zäit an Opmierksamkeet doheem erzéien ze kënnen. Mir sti fir eng Gemeengeféierung, déi maximal sozial ass, bei där kee Mënsch vergiess gëtt, och net eis eeler Matbierger, déi mat Krankheet oder Behënnerung.

D'ADR wäert sech dofir staark maachen, datt d'Gemeengefinanze kompetent, sozial a mat Verstand gereegelt ginn. Da kënn et net zu deenen onnëtzten an onsozialen Erhéijunge vun Taxen. Bestoend Taxe wäerte mir no soziale Kritären upassen, sou datt et hei eng méi gerecht Verdeelung wäert ginn. Deementspriedend géinge mir dofir suergen, datt d'Waassertax sozial berechent gëtt.

Sou hätt all Awunner pro Joer e gratis Waassersockel op de Kapp zegutt, an duerno gëtt de Waasserverbrauch mat enger progressiv gestaffelter Tax berechent. Domat hätt all Bierger säin néidege Grondverbrauch u Waasser ofgedeckt – schliisslech handelt et sech hei ëm e mënschlecht Grondbedierfnes. Esou eng progressiv Präisstaffelung géng awer gläichzäiteg verhënneren, datt déi liewenswichtig Ëmweltressource ouni nozedenke géng verbëtzt ginn.

**ADR:
jonk a
couragéiert**

D'ADR ass eng jonk a couragéiert Partei, déi hir Iddien net just a schéine Sonndesriede versprécht, mee och wirklech duerchsetzt a sech honnertprozenteg fir hir Gemengen asetzt.

Duerfir:

Den 8. Oktober all Stëmm fir d'ADR. Fir eng besser Gemeng. ADR – déi richtig Alternativ!

**Finanzen:
kompetent a
sozial verwalt!**



Inhaltsverzeechnes

Firwat sollt Där e Sonndeg d'ADR wielen?

Esch: Eng Stad fir all Bierger

Säit 1

Sport, Gesondheet a Kultur
Zu all Stonn mobil ... bis an d'Stad

Säit 2

D'Lëtzebuerger Sprooch a Kultur op déi éischt Plaz

Behënnerten- a senioregerecht Politik
6 Prioritéite fir Är Gemeng
Solidaritéit a Gerechtegkeet
Verkëier am géigesäitege Respekt

Säit 3

Kompetent politesch Gouvernance,
w.e.g.!

[Mëmember-Formular](#)

Säit 4

Konkret Hëllef fir Famillje mat Kanner!
Tourismus läit eis um Häerzl

Säit 5

Flüchtligen ophuelen, mat Häerz,
awer och Verstand
Keng Parkplazsuergen fir d'Awunner

Säit 6

Ëmwelt a Liewensqualitéit sinn eis
wichtig

Säit 7


[Eis Kandidate fir Är Gemeng](#)

Säit 8

adr-

A.D.R - Alternativ Demokratesch Reformpartei

Cimolino Louis		
Hoegener Jean-Paul		
Houtsch Roland		
Nikels Christian		
Schmit Steve		
Strodtner Jean-Claude		
Strodtner Magali		
Becker Romain		
Bertemes Alphonse		
Leiner Armand		
Elter Claude		
Engel Irène		
Leonard Georges		
Konsbrück Malou		
Graas Gino		
Klees ép. Deischer Edeltraud		
Deischer Jeannot		
Dos Santos Fialho Francisco Paulo		
Müller Marceline		



Richtig vielen!

Där wëllt der ADR bei dëse Gemengewalen esou gutt wéi méiglech hëllefen? Eise Walsystem erlaabt lech dat op zwou Manéieren:

Am einfachsten a séchersten ass ët, de Krees iwwer der ADR-Lëscht schwartz ze maachen. Esou stellt Där sécher, datt keng Stëmm fir d'ADR verluer geet. Dir hëlleft allen ADR-Kandidate gläichermoossen.

Wann Där awer ee besser kennt oder besonnesch gutt fannt, kënn Där Ärem Wonschkandidat och zwou Stëmmen ginn. Duerno fänkt dann d'Zielen un: An de Kästcher hannert de Kandidaten kënn Dir **am ganze 19 Kräizer** verdeelen, dann hutt Där Äre Stëmmemmaximum erreecht. De Krees däreft Där dann NET méi markéieren. Loosst lech net un der Reiefolleg stéieren. **D'Escher Lëscht ass net an der alphabetescher Rei** publizéiert ginn.

Gratis ëffentlechen Transport
a keng Autos-Schikanen


De Verkéier zu Lëtzebuerg gëtt ëmmer méi schlëmm. D'Gemeng muss e sécher a gläichberechtegt Matenee vun alle Verkéiersdeelhueeler garantéieren.

D'ADR huet eng kloer Linn a Saachen ëffentlechen Transport

- Mär trieden a fir gratis ëffentlechen Transport fir jiddereen
- Gemengenefforten fir den ëffentlechen Transport musse vum Stat ënnerstëtzt ginn
- Den Tram ass keng Solutioun vum Verkéiersproblem a mär si géint d'Ubanne vu weideren Uertschaften
- Gemenge solle sech esou effikass wéi méiglech a regionale Reseauen verbannen, dat an enker Ofsprooch mat den Awunner. All Mënsch muss och no der Owes-Virstellung am Kino (also bis Hallefnuecht) nach gutt mam ëffentlechen Transport heem kommen
- D'Awunner sollen zum Beispill iwwer d'Zuel an d'Plaz vun den Bushaltestellen an och iwwer d'Organisatioun vum Schoultransport kënnematschwätzen
- Iwwerwaachungskameraen a Bussen an Zich maachen den ëffentlechen Transport méi sécher
- Individualverkéier muss eng Wiel bleiwen

Dräi Véirel vun den Trajeten am Land gi mam privaten Auto gemaach. Et ass net un enger Gemeng oder um Stat, dëse private Choix ze kontestéieren oder ze beaflossen.

D'ADR ass géint Schikanen fir Autofuerer (iwwerdriwwen Verkéiersberouegung, kënschtlech Verknappung an Iwwerdeierung vu Parkméiglechkeeten, ze knappe Parking résidentiel, ze penibel



D'Autofuerer si keng Mëllechkéi,
och wann d'Gemeng Esch dat mengt ...

Kontroll vu Parkziedelen op d'Sekonn ...).

Null Toleranz erwaartdeen Automobilist,deen ze séier an der Uertschaft ass, récksiichtslos parkt oder nuets onnéideg Kaméidi mam Auto mécht.

Null Toleranz gëllt fir Foussgänger a Vëloen, déi sech net un d'Verkéisersregelen halen.

Onnéideg geféierlech Situatioune (Bus- oder Vëlosspueren a Géigee-richtung an Einbahnstroossen, Vëlosspueren op Trétoiren an a Foussgängerzonen ...) wäert d'ADR net bestoe loossen.

- Mär garantéieren
- en Ausnotze vum ganze méigleche Parkraum vun der Uertschaft
 - eng Reglementéierung vum Parke vu Betriebsca-
mionnetten ausserhalb vu Wunnzonen
 - fléissende Verkéier op den Haaptverkéisersach-
sen an d'Uertschaft an aus der Uertschaft mat,
wann néideg, entspreichende Contournemen-
ten
 - verkéisersberouegt Wunnquartieren
 - gudd Stroosseninfrastruktur a Verkéisersweeër,
an dat och fir Foussgänger a Vëlofuerer

De Vëlo ass an deene meeschte Fäll méi e Sport- a
Fräizäitgefier wéi e Fortbewegungsmëttel fir schaf-
fen oder akafen ze fueren. Deementspriechend sollte
Vëlospisten och méi regional an touristesch gesinn an
ausgebaut ginn.

Vëlosservicer, wéi si a verschiddenen Uertschaften
bestinn, géinge vun eis op hiren Notzen an hir Käsch-
te gepréift ginn. Och de Sécherheetsrisiko duerch on-
geübte Vëlofuerer, de récksiichtslosen Asaz a Fouss-
gängerzonen, d'Benotze vum Vëlo als Spillsaach an
de Vandalismus, deem dës Gefierer ausgesat sinn,
sollen ënnersicht ginn.



Fir mam Auto vun Esch an d'Stad gëtt et nëmmen een direkte Wee ... an dee geet bal nëmmen am Stau.

Bezuelbare Wunnraum mat Kapp a Verstand!

Wat kann d'Gemeng maa-chen fir hiren Awunner ge-nuch Wunnengen zu engem bezuelbare Präis ze bidden. Si huet zwou Zorte Klientel: Leit, déi genuch Mëttelen hunn, fir eng eege Wunneng ze finanzéieren oder ze lounen, a Leit, déi ganz reell finanziell Schwierigkeeten hunn, um Lëtzebuurger Wunnengsmaart en Daach iwwert dem Kapp ze fannen. Leit, déi an enger Gemeng lounen, sollte sech kënnen op eng gudd funktionéierend Loyerskommissioun verloossen, déi mat duerfir suergt, datt si net ze deier bezuele mussen.

Moosname fir Leit mat klengem Akommes

All Gemeng soll fir sech e gewësse Prozentsaz u gutt iwwer d'Quartiere verdeelte Sozialwunnengen festleeën fir keng "Ghettoen" ze schafen. Gemenge mat ville Sue kënnen an e Fong fir soziale Wunnengsbau investéieren.

- D'Prozedur fir eng sozial Wunneng zougedeele ze kréien, muss transparent sinn, esou datt jiddereen ka wëssen, wéini him ka gehollef ginn
- D'Gemeng soll hire Bierger awer och hëllef Proprietär ze ginn, z.B. mat Bankgarantien
- "Portage foncier" ass besser wéi "Bail emphytéotique". Beim Portage gëtt de Bauterrain fir e symbolesche Betrag gelount, de Kafpräis erfällt no e puer Joer, wann zum Beispill de Bau vum Haus bezuelt ass

Bei gréissere Projeten am soziale Wunnengsbau soll en Deel Wunnengen fir Leit reservéiert sinn, déi net genuch verdéngen, fir eleng ze bauen, awer zevill, fir vum Stat gehollef ze kréien.

Moosname fir Leit, déi bauen oder kafen

- D'Baufuerderungen dierfen de Präis vum Bau



Schéine Wunnraum zu Esch: Just nach Fassad?

net iwwerdriwwen an den Himmel dreiwen. Eng Gemeng dierf net den Haustyp (Passivhaus) bestëmmen

- D'ADR ass géint staatlechen Zwang an Amëschen a privat Affären: Dat gelt och fir d'Virkaftsrecht vun der Gemeng, fir Baulücken an eidel Wunnengen. Proprietären dierfen vun hirer Gemeng net gediirengelt ginn mä si sollen iwwerzeegt ginn
- Verkeeft eng Gemeng hir eegen Terrainen um fräie Wunnengsmaart, dierf si net Maartpräiser froen. Si muss hëllef, de Präis vum Baupland bezuelbar ze maachen

Dat traditionellt Lëtzebuurger Bild vum eegenen Eefamilljenhaus ass fir vill Leit net méi ze bezuelen. Dat wäert de Charakter vun eisen Uertschaften änneren. D'Gemeng muss awer oppassen, datt hire Charakter net vëlleg entstallt gëtt. Si muss kucken fir ënner dem Bevëlkerungsdruck natierlech ze wuessen a weider Liewensqualitéit ze bidden. Si dierf net zur Schlofgemeng oder zur Wunnsiddlung ouni Séil ginn.

6 Prioritéite fir eis Gemeng


1. Bezuelbaart Wunnen: D'ADR huet konkret Solutiounen fir d'Gemeng!
2. Ëffentlech Sécherheet heescht Sécherheet fir jiddereen: Eis Gemenge brauche méi Police, eis Bierger brauche Kommissariat, do, wou si wunnen.
3. Mobilitéit ouni Dirigismus: D'Gemeng organiséiert de Matenee vun Auto, Foussgänger a Vëlo. Si mécht net de Choix vum Verkéiersmëttel.
4. Famillje mat Kanner beschtméiglech ënnerstëtzen: Mir brauchen Uertschaften, wou Kanner sech kënnen wuelfillen an entfalten.
5. D'Lëtzebuurger Sprooch als wichtegst Mëttel zur Integratioun: Un der Gemeng ass et, eis Sprooch ze verbreedern.
6. Flüchtlingen ophuelen, mat Häerz awer OCH mat Verstand: D'Gemeng muss an dëser Fro matschwätzen an d'Decisiounen dierfen net iwwer d'Käpp vun de Bierger ewech geholl ginn.

Blamabel fir d'„Geschäftsstad“

Esch, Uelzechtsstrooss: Déi gréisst Akafs-Foussgängerzone vum ganze Land! Jo, mee:

- Geschäfte stinn eidel
- D'Loyere sinn héich
- D'Parkingspräisser verdreiwe Clienten
- Belval mécht Konkurrenz
- Geschäfte mat méi enger deierer Gamme fanne wéineg Clienten
- Bei der Gemeng stoussen d'Geschäftsleit op daaf Oueren

Ee Geschäft setzt elo e ganz staarkt Zeechen, an dat ass eng Blamage fir ganz Esch. D'Mëtzlerei EMO plënnert ... an zwar net an de Konkurrenzquartier Belval, dee bekannntlech zënter Joere Start"-Schwierigkeeten huet ... mee op Diddeleng! Dat weist, wéi attraktiv Spautz a Co eis Stad gemaach hunn ...



Walprogramm (Lëtzebuergesch)

- https://adr.lu/alternativ_2017_l/
- Wahlprogramm (Deutsch)**
- https://adr.lu/alternativ_2017_d/
- Programme électoral (Français)**
- https://adr.lu/alternativ_2017_f/
- Election program (English)**
- https://adr.lu/alternativ_2017_e/
- Programa eleitoral (Português)**
- https://adr.lu/alternativ_2017_pt/



Fir datt all Bierger a senger Gemeng ka matschwätzen!

D'politescht Matsproocherecht vum eenzele Bierger ass fir d'ADR ganz wichteg. Mir stinn dofir an, datt déi direkt politesch Bedeelegung an d'Transparenz an der Gemeng erhalen a weider ausgebaut gëtt, andeems:

- de lokale Referendum mat vereinfachte Modalitéiten erméiglecht gëtt
- d'Bierger gutt a korrekt informéiert ginn, ënner anerem duerch:
 - ◊ d'Internetiwwerdroung an d'Archivéiere vu Gemengerotsëtzungen
 - ◊ objektiv a politesch neutral Berichter vun de Gemengesëtzungen fir all Stot an dat net erëischt Méint no der Sëtzung
 - ◊ e lokalen Televisiounskanal vun der Gemeng iwwer Kabel-TV an/oder Internet

◊ ëffentlech Informatiounsversammlunge viru grouse Projeten a wichtegen Entscheedungen

Der ADR no muss den Déngscht um Bierger fir d'Gemeng un ëischer Plaz stoen. Dowéinst këmmere mir eis dorëm, datt d'Gemeng

- Verwaltungswëeër esou einfach wéi méiglech mécht
- och baussent „normalen“ Bürosstoen fir dës Demarchen op ass
- och fir staatlech Verwaltung Biergerfroen entgéinhuelen an dobäi berode kann
- méiglechst vill Demarchen och iwwer Internet ubitt
- nieft dem Online-Format ëmmer och d'Pa-beierformat ubitt.

Historesch an architektonesch Schätz fleegen!

Der ADR ass et wichteg, datt eng bestëmmte Liewensqualitéit an der Gemeng ginn ass. Dëst steet am direkten Zesummenhang domat, datt en Ëmfeld erhalten oder geschaf gëtt, an deem d'Leit sech kënnen wuelfillen. Dozou gehéiert och d'Erhale vun eiser traditioneller Bausubstanz a vum Charakter vun de Stied an Dierfer. Schliisslech ass dëst – nieft der Lëtzebuerger Sprooch – e wichtigen Aspekt vun eiser Identitéit.

Mär setzen eis dofir an, datt

- regional-typesch Gebaier a Bausubstanze mat kulturellem Wäert erhale ginn
- et kommunal Subside ginn, fir d'Renovatioun an d'Sanéierung
- d'Gemeng, wann néideg, wäertvoll Gebaier keeft, fir den Erhalt ze sécheren
- d'Bierger fir déi kulturell Schätz vun hirer Uertschaft sensibiliséiert ginn
- d'Gemeng dofir suergt, datt historesch Plazen net duerch onpassend Konstruktiounen verschampeléiert ginn
- mat kierchleche Bausubstanze verantwortungsvoll a respektvoll ëmgaange gëtt



Net nëmme fir Belval ze restauréieren
an ze konservéieren solle Suen do sinn

Ëffentlech Sécherheet ass Sécherheet fir Jiddereen!

All Mënsch huet e Recht drop, sech a sengem Land, senger Gemeng a sengem Heem sécher ze fillen! Dofir mussen de Stat an d'Gemeng enk zesummeschaffen. Bei der Zesummenaarbecht muss d'Gewiicht vun der Gemeng awer rëm méi stark ginn, well dës am nooste mam Bierger a Kontakt steet. Dofir setze mir eis dofir an, datt

- de Stat an d'Gemeng Hand an Hand schaffen
 - Themen, wéi z.B. d'Burka-Verbuet, déi just national an eenheetlech kënnen gereegelt ginn, net dierfen op d'Gemengen ofgewänzelt ginn
 - D'Zesummenaarbecht tëscht der Gemeng an der Police muss awer och méi enk ginn
- Hei maache mir eis staark dofir, datt d'Gemeng:
- zesumme mat der Police a mat senger Bierger e lokale Sécherheetsplang ausschafft, dee reegelméisseg op seng Effikassitéit iwwerpréift gëtt
 - méi e grouss Matsproocherecht bei der Police-präsenz huet, mat Berécksiichtegung vun de kommunale Policereglementer

D'Police muss méi no bei de Bierger. Si soll méi eng grouss Präsenz um Terrain weisen an et dierf net zu rechtsfräien Zone kommen, wou d'Police net higeet. Dofir setze mir eis dofir an, datt

- d'Police déi néideg Moyenen (z.B. de Plazverweis) a genuch Leit huet, fir agéieren ze kënnen
- a méi onrouege Quartiere Kommissariater kommen, déi 24 op 24 Stonne besat a fir d'Bierger accessibel sinn
- d'Police, wann si et wënscht, adequat Lokaler vun der Gemeng zur Verfügung gestallt kritt
- op besonnesch sensibelen, ëffentleche Plaze Kameraen installéiert ginn, awer ënner strengen Oplagen a mat Respekt virun der Privatsphär

D'ADR wäert sech weiderhi fir d'Konzept vun enger Noperschaftspolice asetzen.

Aarmut an organiséiert Heeschchen

D'ADR suergt dofir, datt d'Gemeng efficace Méiglechkeete kritt, fir organiséiert Heescherei, sou wéi aggressiivt Biedelen ze verbidden. D'fräit Zirkuléiere

vun den Bierger an Europa gëllt, wann dës genuch eege Mëttelen hunn, fir hir Existenz ofzesécheren. Dëst soll och um kommunale Plang agehale ginn. Fir dat ëmsetzen ze kënnen, mécht sech d'ADR staark, fir datt d'Police

- mat der Ënnerstëtzung vun der Justiz an eventuell vun der Douane, déi néideg Moyene kritt, fir dat organiséiert Heeschchen an de Grëff ze kréien
- gewësse Leit e Plazverweis ka ginn, woumat hinnen den Openthalt op bestëmmte Plazen verbuede gëtt
- dës Dispositioun net just bei organiséierten Heeschebanden oder bei aggressivem Biedelen uwendet kann, mee och géint aner Banden, kriminell Organisatiounen an Drogendealer virgoe kann

Nëmmen esou Moosnamen an deen néidege gesetzelche Kader kënnen zu enger Verbesserung vun der ëffentlecher Sécherheet féieren.

Der Aarmut muss anescht entgéintgewierkt ginn, wéi Heeschchen als e Mënscherecht ze deklaréieren. Fir d'ADR kann dëst keng Léisung sinn. Dofir ënnerstëtze mir – net just op nationalem, mee och op kommunalem Plang – datt Leit an Nout, déi e Recht hunn, hei am Land ze sinn, gehollef kréien. Als méiglech Moosnamen, gesi mir vir, datt déi Betreffen

- en Ënnerdaach an en wierdegt Liewen erméiglecht kréien, z.B. mat betreitem Wunnen, Nuetsfoyeren, Volleksskichen, Kaffis- an Téistufen
- déi an enger spezieller Situatioun sinn, – Kopelen, Leit mat Kanner oder mat Hënn, asw. – gëeegent Léisunge musse proposéiert kréien
- och op kommunalem Plang vu besser koordinéierten zoustännegen Organisatiounen betreit ginn

Mat esou Moosname viséiere mir, d'Leit „déi op der Strooss liewen“ nees an d'Gesellschaft ze integréieren, mat enger Wunneng, enger Aarbecht, an enger reeller Liewensperspektiv.

----- ausschneiden an un ADR 20, rue de l'Eau L-1449 Lëtzebuerg schécken -----



Gidd Member an der ADR, a frot och Aër Familljemembren a Frënn, fir Member ze ginn.

De Joresbeitrag ass fir eng Persoun 14.-€, fir e Stot 20.-€, a fir Schüler a Studenten 5.-€

Numm & Virnumm:

Adress:

Telefon:

Email:

de pefferkär

Oplag: 15.300

Verantwortlech fir dëse

Pefferkär

fir d'Gemeng Esch ass

d'Alternativ Demokratesch

Reformpartei

22, rue de l'Eau

L-1449 Lëtzebuerg

www.adr.lu

30 Fudder Waasser gratis op de Kapp géint deier „gréng“ Gemengepolitik

Schonn e komescht Gefill, wann ee mueres fréi d'Leit mat hire Grompereschiele gesäit ëm d'ëffentlech Dreckschëscht schläichen ... Dreck ass zu Esch e richteg deiere Spaass ginn. A wie méi wéi eemol am Mount seng deier bezuelte Poubelle virun d'Dir setzt, dee brauch sech iwwer d'Gemengerechnungen net ze wonneren. Duerfir entsuerge Leit hir Reschter ëmmer méi dacks an d'ëffentlech Dreckschëschten, déi dann och séier voll sinn, esou datt d'Leit net wësse wouhi mat deene Saachen, déi daagsiwwer esou ewech ze geheie sinn, wann ee net doheem ass.

Mee eise Schäfferot schéngt keng empfindlech Nuesen ze hunn: Well wéi een et soll maache fir den Haushaltsdreck an de Summerméint ee Mount laang an der Hëtzt ze halen, dorëm këmmert hie sech net. A wou Leit, déi en eegent Haus hunn, dat nach an e kille Keller kënnen stellen, do sinn déi Leit an den Appartementshaiser mat de Poubellen am hënneschten Haff nach méi schlëmm drun.

Gewosst ass, datt praktesch all zweet eleng erzéiend Mamm de Risiko huet, an d'Aarmut ze falen. Wéi soll esou eng Mamm mat zwee kleng Kanner an engem entspreche Verbruch u Wëndelen iwwer d'Ronne kommen, wann eis Gemeng hir bei der Poubelles-Tax esou déif an d'Täsch fiert?

Un deem Beispill erkennt een, wéi ongerecht déi Gemengentaxe sinn. Si treffe jiddereen d'nämmlecht, deen, dee sech et ka leeschten an esou Zommen aus dem Aarm rëselt, awer och deen, deen all Mount Problemer huet, fir iwwer d'Ronnen ze kommen. Dat ass genee wéi d'TVA, déi och den Ënnerscheid net mécht, ob deen, deen akeeft, räich oder aarm ass. Dës Taxen treffe jiddereen d'nämmlecht, awer si dinn deenen enge méi wéi wéi deenen aneren.

Et war fréier bal ni esou, datt d'Leit Problemer haten, fir d' Gemengerechnunge ze bezuelen. D'Taxepolitik ass awer an eng Richtung gaangen, datt d' Rechnungen ëmmer méi déck gi sinn.

**Gréng
wierkt ... op
de Portmonni!**

No enger grénger Iddi sollten d'Leit reell bezuelen, wat e Gemengeservice kascht, onofhängeg dovun, datt vill Gidder a Servicer, déi d'Gemeng

eis verkeeft hir net gehéiere mee ... och all deene Leit, déi si deier mussen bezuelen.

Zum Beispill d'Waasser, wat ee fréier selwer un eng Quell siche gaangen ass. Parallel sinn ëmmer méi streng Riichtwäerter festgesat ginn, déi d'Liwwerung vun extra properem Waasser och ëmmer méi deier gemaach hunn. Allerdéngs ass d'Waasser och ëmmer méi belaascht ginn a war méi schwéier drénkfäerdeg ze maachen. Dat war awer net d'Schold vun all Mënsch, mee all Mënsch muss haut fir déi deier Filteranlage bezuelen.

D'ADR setzt hei un, an zwar mat enger sozialer Approche.

Eis Iddi fir all Mënsch fir d'éischt emol 30 Fudder (30.000 Liter) Waasser am Joer gratis ze ginn an de Waasserverbrauch, deen doriwwer eraus geet, progressiv gestaffelt ze taxéieren, mécht genee dat. Dat Gratis-Waasser geet ongeféier duer fir de Verbrauch fir d'perséinlech Hygiene ze decken. Wat elo am Stot nach ufällt fir

Kachen a Botze kascht e vernünftige Waasserpräis.

**30 Fudder
gratis Waasser
fir jiddereen**

Wien allerdéngs all Dag e Riesegaart nützt (ouni Reewaasser duerfir ze sammeln), wien all Dag Trëttoir, Gaardemauer a viischt Traap ofsprëtzt an den Auto wäscht an eventuell och nach eng grouss Schwämm hannert dem Haus huet, muss sech bewusst sinn, datt dee Luxus op d'Waasserrechnung schléit esou bal säi Verbrauch iwwer dem Sockel läit.

- **D'ADR setzt sech a fir de Bierger!**
- **D'ADR denkt an handelt sozial!**
- **Bei der ADR geet d'praktesch Approach iwwer all blann Ideologie!**

D'ADR ass géint Dirigismus iwwert de Portmonni: Mir sinn do fir dem Bierger ze hëllefen, an net fir de Bierger mat deieren Taxen ze strofen. Mir halen eis net fir de d'Schoulmeeschter vum Land ... an Ënnerscheiden eis domat vun allen anere Parteien.



Waasser ass keen iwwerflëssege Luxus mee en Urecht vun all Mënsch, an zwar zu engem bezuelbare Präis.

Politesch Schäinhellegkeet an der Wuesstemsfal

Wat kloen eis Gemengepolitiker zu Esch an och an aner Uertschaften! A wat stëmmen déi aner Parteien an der Chamber äifreg fir eng Politik, déi de gréissten Deel vun deene Problemer ausléist!

Anescht wéi aner Länner wiest d'Wirtschaft zu Lëtzebuerg och a Krisenzäiten. Dat ass eent vun den Haaptziler vun der Lëtzebuerger Politik, en Zil, dat een awer méi genee misst ënnert d'Lupp huelen.

Esouguer a Kriisjoren ginn zu Lëtzebuerg nach eng 10.000 Aarbechtsplaze geschaf, a bei véier Prozent Wirtschaftswuesstem sinn et der gutt 15.000.

De Gros vun deene Aarbechtsplaze gëtt vu Grenzgänger besat, well hei am Land anscheinend déi néideg Qualifikatiounen feelen. 80 Prozent vun de Grenzgänger komme mam Auto op hir Aarbecht, well den ëffentlechen Transport net déi néideg Kapazitéiten huet oder well si net mam ëffentlechen Transport vun doheem op hir Aarbecht kommen. Dat mécht am Schnëtt ronn 8.000 zousätzlech Autoe pro Joer aus. Een Auto bedeit sechs Meter am Stau. An anere Wieder gëtt eist Stroossenetz mat 8.000 Autoen mat bal 50 Kilometer Stau weider belaascht - iwwer den Dag verdeelt.

Wa mer eng Politik maachen vu weiterem stramme Wuesstem gëtt de Verkéierschaos vun Dag zu Dag méi grouss an déi eenzel Stied an Uertschaften mat Autoslawinen erstéckt.

Genausou verhält et sech mat der Wunnungsproblematik. Wa mir esou vill Aarbechtsplaze schaafen an d'Leit all Dag am Stau stinn, ass et eng logesch Konsequenz, datt déi méi no bei hir Aarbecht wëlle wunne kommen. Duerfir gëtt den Drock op de Wunnungsmaart vu Joer zu Joer méi grouss, an d'Präisser, wéi an de leschte Joeren, praktesch ëm 5 Prozent pro Joer klammen.

Net nëmme ginn duerch Industriezonen d'Wisen zoubetonéiert, mee dës Politik dréit och nach zu engem zousätzleche Verkéiersopkomme bäi. Mat dëser Politik wäert an de nächste Joeren de Verkéierschaos vun Dag zu Dag méi grouss ginn.

Schäinhelleg ass et duerfir, wann d'Parteipolitiker vu Beetebuerg an Diddeleng versichen, sech de schéine Männchen bei hire Bierger ze maachen, a sech opreegen iwwer de Verkéierschaos, deen Dag fir Dag an dësen Uertschaften méi grouss gëtt.

Et sinn awer déi nammlechte Politiker, déi op Gemengeplang matdecidéiert hunn, déi Industriezonen do ze implantéieren an op nationalem Plang als Deputéierten d'Politik vun engem maximale Wuesstem blannemännchenes ënnerstëtzen.

Matschaffen! Froen? Ureegungen!

Hutt Dir Froen oder Ureegungen oder wëllt Dir bei ons aktiv matschaffen, dann zéckt net a rufft un, ënner der Nummer:

+352 26 20 37 06

Zu Esch gi gezilt ADR-Plakater futti gemaach



**E Merci vun de ville Benevolen,
déi eis Plakater gepecht hunn, du Toppert!**

D'ADR ass eng vu Grond op demokratesch Partei, déi esou am politesch System vu Lëtzebuerg verankert ass, datt si e Verrieder an de Staatsrot schéckt.

Vun eise politesche Géigner a vun der Press gëtt awer gär probéiert, eis un de rietse Bord ze réckelen a mat auslännesche Parteien a Verbindung ze bréngen, déi vill méi extrem Ziler hunn. D'Resultat vun därer permanenter Hetz- an Haasskampagne an de Medien géint d'Alternativ Demokratesch Partei gesäit een elo och zu Esch.

Et sinn eis Plakater fir d'Gemengewalen, un deene verschidde Leit sech ausloossen, déi eis soss op de soziale Medien déi onméiglechst Frechheeten, Verleumdungen a verdréiten Tatsachen un de Kapp geheien. Zum Ausdrock brénge si mat deenen Aktiounen, datt si zudéifst ondemokratesch denken an deene Leit, déi net hirer Meenung sinn, de Mond wëlle verbidden. Meescht geschitt dat och nach mat grouse Wieder am Mond, wéi Demokratie, Fräiheet an Mënscherechter. Wann een näischt am Kapp huet wéi Haass op alles, wat net dem lénken ideologesche Multikulti-Gender-Mainstream entsprécht, weist en aarme Geescht eben engem onschëllege Plakat, wat hien fir en Dichtegen ass!

Beim Zuch- a Busabonnement hëllefen ...

Mir fuerderen, datt den ëffentlechen Transport gratis gëtt. Esou laang dat net de Fall ass, soll sécher gestallt sinn, datt déi Leit, déi sech net esou gutt stinn, esou mann wéi méiglech fir Zuch a Bus bezuelen.

Fir si ass ee Joresabonnement e ganz deiert Investissement. Dat ass awer 160 Euro méi bëlleg wéi 12 Mount-Aboën. Dofir wäert all Gemeng, wou d'ADR eppes ze soen huet, d'Jores-Abonnement finanzéieren hëllefen. Et kann da kamoud am Laf vum Joer zrëckbezueelt ginn ...

Wat sinn d'Alternative fir Är Gemeng?

Mir stellen an der Gemeng déi richteg Froen: Wat notzen zum Beispill déi bescht Reglementer, wann net genuch Police d'Sécherheet ka garantéieren?

D'ADR ass och géint d'staatlecht Ariichte vu Flüchtlingsfoyeren, ouni datt d'Gemeng an hir Bierger gefrot ginn. Beim Wunnengsbau weess d'Gemeng besser wéi de Stat, wou séier ka Wunnraum geschaf ginn.

D'Gemeng ass do, fir hire Bierger d'Liewen einfach ze maachen. Un d'Beruffs- a Privatlieden ugepasschten Öffnungszäiten, "Guichet unique"-Funktione fir staatlech a kommunal Froen an Internet-Interaktivitéit sinn do néideg.

Op de Gesondheitsniveau iwwerdroen: Eng ADR-Gemeng wäert Drock maachen fir mat regionalen Dokteschhaiser (an hiren Hausapdikten) eng zäitgeméiss Versuergung, déi de berufflechen a familiäre Besoine vun de Bierger entsprécht, ze organiséieren.

D'Gestioun vun de Gemeengefinanze „en bon père de famille“ heescht, datt Kreditter just fir konkret In-

vestitioune opgehall ginn.

Et ass net un der Gemeng, z. B. iwwer intelligent Compteuren, den Energiekonsum vun hire Bierger auszespionéieren.

Realistesche Klimaschutz ass eng Gemeengeprioritéit: D'Nodeeler vun erneierbaren Energien – Kaméidi, Ästhetik, Schied an der Natur, finanziell Auswierkungen – dierfen net op de Bierger oder Betriber ofgewänzelt ginn.

D'Gemeng ass awer net do fir hir Bierger duerch héig Taxen ze zillen oder duerch eng Verknappung vu Parkplätzen, onsënneg Reglementer an aner Schickanen um Autofueren ze hënnere.

D'Gemeng soll beim Erhale vu wäertvoller Bausubstanz hëllefen, an net d'Renovéieren an d'Baue mat iwwerspëtzte Reglementer onméiglech maachen.

D'ADR verdeedegt de Choix vum Bierger an deem säi Recht, säi Liewen an eventuell säi Betrib no beschtem Ermoossen ze féieren.



**Méi Police ... och fir organiséiert Heeschen
an de Grëff ze kréien**



**Net nëmmen nei Projeten verlaangen de Asaz vum
Schäfferot: Et muss och erhale ginn, wat do ass!**

De Rettungsdéngscht a sécher Gebaier ...

D'ëffentlech Ariichtunge vun enger Uertschaft kënnen Schutz bidden an zur Sécherheet bäidroen, wa si bestëmmte Konditiounen erfüllen. Dowéinst setzt sech d'ADR an der Gemeng dofir an, datt

- urban Miwwelen (Busarrëten, Bänken asw.) op ëffentleche Plazen op eng Manéier ugeluecht sinn, déi weder donkel Gestalten nach Vandalen ulackelen
- ëffentlech Gebaier, (d'Gemeng, d'Schoulen, asw.) duerch technesch Moosname wéi Alarmanlagen oder duerch d'Präsenz vu Personal geschützt ginn
- Och de Rettungsdéngscht spillt eng Roll bei der Sécherheet. Oft si Mënschen an Noutfäll – wou et net seelen ëm Liewen an Dout geet – op hir Präsenz a qualifizéiert Hëllefsléschungen ugewisen. Eng national Reform vum Pompjees-

a Rettungswiesen ass amgang, iwwer d'Bühn ze goen.

D'ADR begréisst déi grouss Prinzipie vun dëser Reform, awer mir maachen eis och staark dofir, datt:

- d'Gemeng hei net u Responsabilitéit verléiert, andeems eng ganz Rei vun de Gemeengenaufgaben op den nationale Plang iwwerdroe ginn
- d'Pompjeesveräiner an deenen eenzelen Dierfer a Quartieren bestoe bleiwen, fir weiderhi méiglech vill Fräiwëlleger am Rettungsdéngscht ze hunn dës lokal Kräfte Ënnerstützung kréien, fir Aktivitéiten an der Gemeng ze organiséieren

Pompjees- a Rettungswiese si fir d'ADR e wichtige Bestanddeel vun der lokaler Sécherheet. Dofir sollen dës Kräfte déi néideg Ënnerstützung kréien, fir sech beschtméiglechst organiséieren ze kënnen.

Trauerspill vun der Escher Koalitioun op RTL

Zu Esch hate mär d'Éier, deen éischte Ronnen Dësch vun RTL ze empfänken. D'Parteien, déi mat enger Lëscht an de Gemengewalkampf ginn, waren all age-lueden. Fir d'Escher ADR-Sektioun war hire President Louis Cimolino un de Mikro geschéckt ginn.

Hien huet d'Meenung vun der ADR mat kloere Wieder vertrueden. Als „jonke“ Politiker (dee nach net laang matmëscht) huet hie sech méi wéi gutt duerchgesat.

Op d'Fro fir mat Jo oder Nee ze beäntweren, op d'ADR an de Gemengerot gehéiert, huet de Louis Cimolino als eenzegen mat engem haarden an däitleche JO geäntwert. Hien huet dëse Jo net laangootmeg erkläert, mee sech un d'journalistesche Spillreegele gehalen ouni nach grouss Erklärungen ze ginn. Och do si mär net wéi déi aner Parteien, déi ugefaang hunn, laang ëm de Bräi ze schwätzen.

Wat de politeschen Debat ugaangen ass, war déi aktuell rout-gréng Koalitioun ganz séier an Erklärungs-nout. D'RTLs-Journalisten Corinne Folscheid an Eric Ewald hu reieweise Problemer vun der zweetgréisster Stad vum Land opgeworf. Hei e puer aus enger laanger Lëscht vun Themen, déi ugeschnidde gi sinn:

- Wunnengsnout a soziale Wunnengsbau
- Infrastrukturen
- Industriefrichë Belval a Schëffleng
- Problemer vu Geschäftsleit
- Verkéiersproblemer
- Sécherheet a Propretéit

All dat war an enger Stonn natierlech nëmme just unzeschwätzen. Mee opgefall ass, wéi nervös déi aktuell Koalitioun an dës Wale geet. Opgefall ass och, datt de Klima an der rout-grénger Koalitioun net besonnesch gutt ass.

D'Buergermeeschtesch huet zum Beispill op d'Fro, ob si d'Koalitioun wéilt fortféiere geäntwert, dat d'uer fir

**Buerger-
meeschtesch:
rout Arroganz**

déi Gréng fir d'éischt emol genuch Sëtz misste kréien. Eng zimlech Frechheet fir de Wieler: Well d'Madame Spautz zweiwelt just un hirem Koalitiounspartner, awer absolut net drun, datt hir Partei genuch Stëmme kritt

fir an de Schäfferot. Dat nennt een Arroganz.

Déi donkelrout Buergermeeschtesch war iwwerregens esou aggressiv wéi mär si kennen. Si ass all Mënsch an d'Wuert gefall an huet esou haart wéi méiglech Saache behaapt, wou aner Leit aner Meenung sinn, ob si de Mikro hat oder net. Am léifsten hätt d'Vera Spautz eigentlech ganz eleng geschwat an erkläert, datt Esch vun hir gutt gefouert gi wär.

Dat stëmmt bedenklech an enger Stad wéi Esch: Mat eiser gemëschter Bevëlkerung mat esou ville sozial an kulturell verschidde Hannergrënn, wou d'Integratioun beschtefalls just ugefaangen huet, sinn engersäits Nolauschteren an andersäits sachlech a manéierlech Diskutéieren zwou Kardinaltugenden. Et ass just dat, wat déi aktuell Buergermeeschtesch net kann. E schlecht Beispill fir d'Gemeng.

De grénge Schäffen Martin Kox hat bei der RTL-Emissioun kee gudden Dag erwëscht. Hien ass opgetrueden, wéi wann d'Biohinger him d'Brout an d'Sonneblummekäre geholl an och nach d'Birkenstocksandalen zerpickt hätten.

Wéi hie sollt zum Bilan vun der Koalitioun Stellung huelen, bei all deene Problemer, déi virdrun opgezielt gi waren, hat hien awer eng Léisung fir déi Escher Suerge parat: „Et sinn dräi Bamhaiser um Gaalgebierg fäerdeg.“

Dräi Baamhaiser um Gaalgebierg: Dat ass de rout-grénge Bilan no sechs Joer Esch. Dat léist weder d'Sécherheetsfroen nach d'Wunnengsnout. D'Taxe bleiwen déi deierst vum Minett an d'Stroose kréien ëmmer méi grouss Lächer. Esch päift aus dem leschte Lach ... mee déi Gréng sinn houfreg op hir dräi Baamhaiser um Gaalgebierg.

Et sinn déi gréng Gemengentaxen, déi de Leit d'Strass zoudrécken. A wann Déi Gréng mat den Taxe fäerdeg sinn, wëlle si eis anscheinend elo op d'Beem driewen.

No där Emissioun do stellt sech d'Fro net méi, op d'ADR zu Esch eng wichteg Roll ze spillen huet. Et gëtt héich Zäit, datt Rout a Gréng ofgewielt ginn.

**... a
gréng
Schäffe-Chaos**

D'Regierung reift sech d'Hänn!

Ass lech eigentlech opgefall, datt de ganze Summer, an elo nach bis an den Hierscht iwwerhaupt net vun eiser Regierung geschwat ginn ass? Bei hirem Beléiftheetsgrad wäert Gambia doriwwer awer och net rose sinn. Esou Gemengewale sinn dach och d'Geleeënheet, fir Gambia ze weisen, wéi beléift d'Regierung ass.

Tatsächlech steet d'Regierung och an dëse Gemengewalen zur Wiel: Et sinn déi nämmelech Parteien, déi d'TVA erhéicht hunn, déi an de leschte Joren ënnert ecologesche Virwänn och un de Gemengentaxe gedréit hunn, bis vill Leit et bal net méi packen.

Et ass déi nämmelech Regierung, déi op Wuessstem schwiert, an deenen hir lokal Politiker d'Infrastrukturen net méi an der Rei gehale kréien a keng bezuelbar Wunneng an hirer Gemeng kënnen presentéieren. Wann d'Gemengen am Verkéier erstécken, läit dat un deem Wuessstem, deen d'Regierungsparteie mam bloe Finanzminister a mat de Gambia-Lokalpolitiker an der Chamber feieren. An de grénge Transportminister kritt de Chaos net an de Grëff.

Et ass d'Gambia-Regierung, déi d'Stied forcéiert, ëmmer méi Awunner ze hunn an och dat leschte Stéck Gewan zouzebauen fir méi Suen ze kréien. Net nëmme schued d'Politik de Landgemengen, mee si mäsch d'Hauptstad an d'Gemenge ronderëm an och grouss Südgemengen, well si wuessen, obwuel déi haut schonn éischter zevill Awunner hunn, wéi net genuch.

Wann also DP, LSAP an Déi Gréng lech dat Blot (oder dat Rout oder dat Gréngt) vum Himmel versprechen oder sech iwwert den Zoustand an der Gemeng bekloen a soen, si kéinten awer net duerfir, denkt drun, datt si an hir Parteien an der Chamber déi Politik matdroen, déi hei am Land d'Problemer mécht!

Eng jugendlech Gemeng



D'Drogeproblematik bei der Jugend bleift leider aktuell. Si stellt sozial an och gesondheetlech, fir de Beträffenen a fir seng Famill a säin Ëmfeld e grouse Problem duer.

D'ADR setzt sech dofir an, datt d'Gemeng e spezielle Service schaaft, deen déi betraffe Jugend opfängt. Dëse Service soll eng diskret Ulafstell bidden, wou betraffe Jugendlecher an hirt Ëmfeld sech kënnen beroden an hëllef loossen. Mir wäerten och Selbsthëllefgruppen an der Gemeng förderen a probéieren, hinnen diskret Versammlungsméiglechkeeten ze ginn.

Mir suergen dofir, datt et en aktiivt Jugendhaus gëtt, wou Jonker sech entfale a beschäftege kënnen, mat Hëllef vun Educateuren, wa si dat wëllen.



De Louis Cimolino um Micro vun RTL.

Lëscht 6



Cimolino Louis
68 Joer
Pensionéiert



Becker Romain
51 Joer
Mecanicien



Bertemes Alphonse
62 Joer
Pensionéiert



Deischer Jeannot
49 Joer
Salarié



**Dos Santos Fialho
Francisco Paulo**
49 Joer
Salarié



Elter Claude
60 Joer
Pensionéiert



Engel Irène
64 Joer
Pensionéiert



Graas Gino
39 Joer
Aarbechter



Hoegener Jean-Paul
60 Joer
Pensionéiert



Houtsch Roland
57 Joer
Attaché parlementaire



**Klees ép Deischer
Edeltraud**
52 Joer
Hausfra



Konsbrück Malou
52 Joer
Pensionéiert



Leiner Armand
82 Joer
Pensionéiert



Leonard Georges
53 Joer
Pensionéiert



Müller Marceline
49 Joer
Salariée



Nikels Christian
52 Joer
Gemengenaarbechter



Schmit Steve
34 Joer
Salarié



Strottner Jean-Claude
67 Joer
Pensionéiert



Strottner Magali
33 Joer
Salariée